

# Vrijednosti vezane za Kur'an

[ Bosanski – Bosnian – بوسني ]

Muhammed b. Ibrahim et-Tuvejdžiri

Prijevod:

Senad Muhić

Revizija:

Ersan Grahovac

2014 - 1435

IslamHouse.com

# ﴿ فضائل القرآن ﴾

« باللغة البوسنية »

محمد بن إبراهيم التويجري

ترجمة:

سناد موهنتش

مراجعة:

أرسان غراهوفاتس

2014 - 1435

IslamHouse.com

# Vrijednosti vezane za Kur'an

## Vrijednost Kur'ana

Allah Uzvišeni kaže:

1. *Allah objavljuje najljepši govor, Knjigu sličnu po smislu, čije se poruke ponavljaju, zbog kojih podilazi jeza one koji se Gospodara svoga boje, a kada spomene ime Allahovo, kože njihove i srca njihova se smiruju. Ona je Allahov Pravi put na koji On ukazuje onome kome On hoće; a onoga koga Allah ostavi u zabludi niko na Pravi put neće moći uputiti.* (Ez-Zumer, 23.)

2. *Ovaj Kur'an vodi jedinom ispravnom putu, i vjernicima koji čine dobra djela donosi radosnu vijest da ih čeka nagrada velika, a da smo za one koji u onaj svijet ne vjeruju - bolnu patnju pripremili.* (El-Isra, 9-10.)

3. *Mi tebi objavljujemo Knjigu kao objašnjenje za sve i kao uputu i milost i radosnu vijest za one koji jedino u Njega vjeruju.* (En-Nahl, 89.)

**4. A ova Knjiga koju objavljujemo jeste blagoslovljena, zato je slijedite i grijeha se klonite da bi vam se milost ukazala.** (El-En'am, 155.)

### **Vrijednost onoga ko čita Kur'an i radi po njemu**

Allah Uzvišeni veli: ***A oni koji se čvrsto drže Knjige i koji obavljaju molitvu - pa, Mi doista nećemo dopustiti da propadne nagrada onima koji čine dobra djela.*** (El-E'araf, 170.)

Ebu Musa prenosi da je Poslanik, sallallahu alejhi ve sellem, kazao: „**Primjer vjernika koji uči Kur'an je kao primjer utrudždžeta,<sup>1</sup> njen miris je lijep, a i okus joj je lijep. Primjer vjernika koji ne uči Kur'an je kao primjer datule, ona nema mirisa, a okus joj je sladak. Primjer munafika koji uči Kur'an je kao primjer bosiljka, njen miris je lijep, a okus joj je gorak, a primjer munafika koji ne uči Kur'an je kao primjer hanzale (gorke divlje tikvice čija je stabljika ružnog izgleda), ona nema mirisa, a okus joj je gorak.**“<sup>2</sup>

---

<sup>1</sup> Vrsta voća nepoznata na našim prostorima, po nekima je to mango.

<sup>2</sup> Bilježi Buharija, br. 5059., i ovo je njegov verzija, i Muslim, br. 797.

## Vrijednost izučavanja Kur'ana i podučavanja njemu

Allah Uzvišeni kaže: *Nezamislivo je da čovjek kome Allah da Knjigu i znanje i vjerovjesništvo - poslije rekne ljudima: Klanjajte se meni, a ne Allahu! - nego: Budite Božiji ljudi jer vi Knjigu znate i nju proučavate!* (Alu Imran, 79.)

Osman prenosi da je Poslanik, sallallahu alejhi ve sellem, kazao: „**Najbolji među vama su oni koji Kur'an uče i njemu podučavaju.**“<sup>3</sup>

### Vrijednost onoga ko vješto uči Kur'an

Aiša prenosi da je Poslanik, sallallahu alejhi ve sellem, kazao: „**Onaj ko vješto uči Kur'an je s plemenitim melekima pisarima. A onaj koji uči Kur'an zamuckujući i kojem je teško ima dvostruku nagradu.**“<sup>4</sup>

### Vrijednost okupljanja radi učenja Kur'ana

---

<sup>3</sup> Bilježi Buharija, br. 5027.

<sup>4</sup> Bilježe Buharija, br. 4937., i Muslim, br. 798., i ovo je njegova verzija.

Ebu Hurejre prenosi da je Poslanik, sallallahu alejhi ve sellem, kazao: „**Kada god se okupi grupa ljudi u nekoj Allahovoj kući radi učenja i proučavanja Kur'ana, na njih se spusti smirenost, obaspe ih milost, okruže ih meleki i Allah ih spomene kod onih koji su kod njega. Ko zaostaje zbog svojih djela, njegovo porijeklo mu neće pomoći da napreduje.**“<sup>5</sup>

### **Obaveza druženja sa Kur'anom (kako se ne bi zaboravio)**

Ebu Musa prenosi da je Poslanik, sallallahu alejhi ve sellem, kazao: „**Budite u stalnoj vezi sa Kur'anom, jer tako mi Onoga u čijoj je Ruci moja duša, Kur'an se brže zaboravlja, nego što se deva odveže od užeta za koje je privezana.**“<sup>6</sup>

### **Vrijednost slušanja Kur'ana**

Allah Uzvišeni veli: ***Za one koji izbjegavaju da se kumirima klanjaju i koji se Allahu obraćaju - njima su namijenjene radosne vijesti, zato obraduj robove Moje***

---

<sup>5</sup> Bilježi Muslim, br. 2699.

<sup>6</sup> Bilježe Buharija, br. 5033., i ovo je njegova verzija, i Muslim, br. 791.

*koji Kur'an slušaju i slijede ono najljepše u njemu; njima je Allah na Pravi put ukazao i oni su pametni.*  
(Ez-Zumer, 17-18.)

Od Abdullaha b. Mes'uda se prenosi da mu je Poslanik, sallallahu alejhi ve sellem, rekao: „**Uči mi Kuran.**“, a **Ibn Mesud mu odgovori: „Zar da tebi učim, a tebi se objavljuje?“**, na što mu Poslanik reče: „**Ja imam želju i volim da slušam učenje drugog.**“ Dalje kazuje Ibn Mes'ud: „**Učio sam suru en-Nisa' sve dok nisam stigao do ajeta: *A šta će tek biti kada dovedemo svjedoka iz svakoga naroda, a tebe dovedemo kao svjedoka protiv ovih?* Pa mi je Poslanik kazao: 'Stani,' a ja sa m vidio u njegovim očima suze.**“<sup>7</sup>

## **Vrijednost postupanja po Kur'anu**

Ibn Omer prenosi da je Poslanik, sallallahu alejhi ve sellem, kazao: „**Ne smije se zaviditi osim u dva slučaja: čovjeku kojem je Allah dao Kur'an, pa ga on uči i radi po njemu i danju i noću i čovjeku kojem je Allah dao imetak pa ga on udjeljuje i danju i noću.**“<sup>8</sup>

---

<sup>7</sup> Bilježe Buharija, br. 5050., i ovo je njegova verzija, i Muslim, br. 800.

<sup>8</sup> Bilježe Buharija, br. 5025., i Muslim, br. 815., i ovo je njegova verzija.

## Vrijednost uljepšavanja glasa prilikom učenja Kur'ana

Ebu Hurejre prenosi da je Poslanik, sallallahu alejhi ve sellem, kazao: „Allah ničemu nije dozvolio nešto kao što je dozvolio Vjerovjesniku, sallallahu alejhi ve sellem, lijep glas kojim će melodično učiti Kur'an.“<sup>9</sup>

### Vrijednost sure El-Fatihe

Ebu Se'id El-Mu'alla kazuje da mu je Poslaik, sallallahu alejhi ve sellem, kazao: „Hoćeš li da te podučim najveličanstvenijoj suri?“ Pa mu je kazao: „*Hvala Allahu Gospodaru svjetova/Elhamdulillah rabbil-'alemin*; to je sedam ajeta koji se ponavljaju i veličanstveni Kur'an koji mi je podaren.“<sup>10</sup>

### Vrijednost sure El-Ihlas

Ebu Se'id prenosi da je nek čovjek čuo drugog čovjeka kako ponavlja suru El-Ihlas, pa kada je svanulo, otišao je

---

<sup>9</sup> Bilježe Buharija, br. 5024., i Muslim, br. 792., i ovo je njegova verzija.

<sup>10</sup> Bilježi Buharija, br. 5006.



do Poslanika, sallallahu alejhi ve sellem, i obavijestio ga o tome. Nakon toga Poslanik, je kazao: „**Tako mi Onoga u čijoj je ruci moja duša, ta sura vrijedi trećinu Kur'ana.**“<sup>11</sup>

### Vrijednost sura El-Felek i En-Nas

Ukbe b. Amir prenosi da je Poslanik, sallallahu alejhi ve sellem, kazao: „**Zar nisi čuo koji su mi ajeti objavljeni ove noći? Nikada mi nije ovakvo nešto objavljeno: *kul e'uzu bi rabbi-l-felek i kul e'uzu bi rabbi-n-nas.***“<sup>12</sup>

### Vrijednost sure El-Bekare

Eb Hurejre prenosi da je Poslanik, sallallahu alejhi ve sellem, kazao: „**Nemojte svoje kuće činiti grobovima. Doista šejtan bježi iz kuće u kojoj se uči sura El-Bekare.**“<sup>13</sup>

---

<sup>11</sup> Bilježi Buharija, br. 5013.

<sup>12</sup> Bilježi Muslim, br. 814.

<sup>13</sup> Bilježi Muslim, br. 780.

## Vrijednost oporuke Kur'anom

Talha veli: „Upitao sam Abdullaha b. Ubejja: 'Da li je Poslanik, sasallahu alejhi ve sellem, oporučio nešto (vezano za imetak i vlast)?' Rekao je: 'Ne.' Kazao sam: 'Kako su ljudi onda oporučivali, bilo im je to naređeno, a Poslanik nije ništa oporučio?' Rekao je: 'Ostavio je u oporuku Allahovu Knjigu.'<sup>14</sup>

## Vrijednost učenja Kur'ana

Allah Uzvišeni veli: *Oni koji Allahovu Knjigu čitaju i molitvu obavljaju i od onoga čime ih Mi opskrbljujemo udjeljuju, i tajno i javno, mogu se nadati nagradi koja neće nestati da ih On prema onome što su radili nagradi i još im iz obilja Svoga da, jer On mnogo prašta i blagodaran je.* (El-Fatir, 29-30.)

Od Ebu Umame El-Bahilija se prenosi da je rekao: „Čuo sam Allahovog Poslanika, sallallahu alejhi ve sellem, kako kaže: 'Učite Kur'an, jer on će se zauzimati za svoje sljedbenike na Sudnjem danu! Učite dvije blistave sure – El-Bekare i 'Ali Imran, jer će ove dvije

---

<sup>14</sup> Bilježe Buharija, br. 5022., i ovo je njegova verzija, i Muslim, br. 81634.

**sure na Sudnjem danu doći kao dva bijela oblaka, dvije sjenke ili dva jata ptica zbijenih u redove i zastupati svoje privrženike na Sudnjem danu. Učite suru 'El-Bekare', jer je u tome blagodat, dok je, u suprotnom, propast. Njoj sihirbazi ništa ne mogu!**<sup>15</sup>

Ebu Hurejre prenosi da je Poslanik, sallallahu alejhi ve sellem, jedne prilike upitao: „**Da li bi neko od vas, kada se vrati svojoj kući volio da nađe tri steone krupne deve?**” Rekli su: „**Da, voljeli bismo.**“ A on tada reče: „**Tri ajeta koja neko od vas prouči u namazu bolja su od toga.**“<sup>16</sup>

Abdullah b. Amr prenosi da je Poslanik, sallallahu alejhi ve sellem, kazao: „**Kazat će se (na Sudnjem danu) onome ko se družio sa Kur'anom: 'Uči i penji se, uči lijepo i razgovjetno kao što si učio na dunjaluku, a tvoje mjesto u Džennetu će biti kod posljednjeg ajeta kojeg proučiš.**“<sup>17</sup>

---

<sup>15</sup> Bilježi Muslim, br. 804.

<sup>16</sup> Bilježi Muslim, br. 802.

<sup>17</sup> Hadis je ispravan, a bilježe ga Ebu Davud, br. 1464., i ovo je njegova verzija., i Tirmizi, br. 2914.